



南雁蕩山志卷八

平陽 周 喟井廬 編

遊記

唐

吳

畦見詩
外編

陪邵太守遊南雁山記

乾符甲午東嘉穀歉暴民椎剽村落者治莫之禁且農植又苦旱
民憂皇如也吾甌刺史錢公鏐去任會浙招討司副使邵公攝守
茲土出淹滯施舍已責凡前守政令不便於民者悉更新之立壇
壝以雩禱至有所格四月丙辰雨戊子又雨年卒獲登先時羣兇

逼近聞公至皆破膽巢穴遠移於山公方急農事乃不窮追至是
悉解散東土既平而復大有年百姓始嘗生民之樂明年乙未期
月治也百廢具舉政府無事乃始行郊野以至橫陽去治西南二
百里有雁蕩山隱於榛莽自前康樂謝公未之至也公與僚屬泛
溪而上至蒲潭潭之水青渟黛蓄與天一色鵲鵲往來可畫入里
許其水漸淺沙石皆露乃倚棹山根溪花沿流而下舟楫皆香遂
登而陸夾道兩峰相望山之門南北有石華表凌空而起者將二
千丈公竦觀曰屹哉若擎天然懷柱國之心者思焉其南峰連翼
而立北山有峰若飛來者如削如琢奮舉騰舞勢甚可怪於是度
石梁攀援而上鳥道隱見於石間公曰危哉若履艱然抱扶顛之

志者思焉力倦復下從者曰茲有洞視之廓然一巖宇也洞之內
有石盂容水一升其水自上涓涓而下增亦不溢飲亦不減由洞
而入三百步不可窮追而返公命洗盞更酌於洞之門各賦詩適
志日旰宿於山下明日復選勝登明王峰觀梅雨瀑淒霏砭肌盛
夏如秋緣山而北登石虎峰歷六十餘而銀屏峰在雁蕩之北蒼
翠詭狀尤爲奇絕峰之下廢地十里無烟火迹從者曰是山也僻
而隱或逢不若故觀者鮮至惟公覽焉予曰不然蘭亭不逢右軍
則佳景湮沒空山以雁蕩之勝而隱於草莽世未之識惟公取焉
有其具也然無其時不可也向者吾土騷擾公憂也繼以歲凶公
憂也今我公得與民同樂矣有其地有其具有其時也不可以不

記 陳志鄭志

案吳任臣十國春秋錢鏐字輔軒武肅胞弟累授溫明二州刺

史開運二年卒年五十五

吳越備史作五十三

自開運二年逆推之當生

於大順二年辛亥上距乾符元年甲午凡十七年時鏐尙未生
焉有任溫刺史之事鏐之刺溫在後梁貞明六年庚辰爲吳越
天寶十三年至後唐同光二年甲甲爲吳越寶大元年鏐尙在
溫見戴氏東甌金石志錢鏐康樂巖題名此記蓋贗作也孫詒
讓羅昭諫江東外紀辨疑無吳畦其人恐或然

明

馬性魯

見詩外編

遊雁山記

予閱一統志知東甌之雁蕩山二繼入諫院聞諸浙士大夫則知
係樂清者勝甲天下迨遷平陽聞昆鄉士夫又知係茲境者其勝
匹樂清予素癖山水邑進士蔡君茂之尤嗜古好奇有是癖謂樂
清不可卒往境內固可往也屢約弗果者久矣今年秋九月會予
舉觀省典茂之來訂舊約且約僉揮馮君大紀邑庠司訓蔡君汝
學及庠生徐生祺周生屺爲輔行時戊申泛舟自南津出荆溪過
錢鎮沂北港越翼日庚戌至焉信矣夫形勝之奇勝風景之佳麗

層見疊出千態萬狀殆未易以一二語模寫追憶向之所聞奚翅
倍蓰不識樂清之勝爲何如以意逆之此固其流匹云惜乎終日
之力不能窮搜而遍觀也旣而與諸君返憩於古精舍將賦詩以
記之說者曰茲山之勝視樂相若也而何聲聞顯晦有弗若歟予
從而白之曰物有顯晦常也若二山之弗齊者無他所處之地異
所遇之類殊故耳自夫幸而據要會介衝達琳宮梵宇之所點綴
也貴遊巨公之所經往也騷人墨客之所游歷也雄篇巨筆絺章
繒句爲之鋪張播揚也相聞此地宋闡文教有育英才修詩書之
業懷致用之具以奮起後先者固彬彬其盛然而其處也爲端士
其出也爲名臣亦惟其身之修與道之行以達諸四方是其勝日

以彰名日以顯也無足怪焉者夫惟不幸而令墜荒遠阨窮僻外
室中聞知之者蓋寡矣其晦也固宜抑末矣若夫山之本真則自
開闢以來至於今不知其幾千萬年厥形以賦洪纖別矣厥象以
凝高卑判矣其所謂奇勝佳麗蓋一定而不變也曾何以顯晦少
有增損也豈惟是哉吾道則亦有然者矣孔子曰不曰堅乎磨而
不磷不曰白乎涅而不緇孟子曰雖大行不加焉雖窮居不損焉
分定故也其殆此之謂乎今日之游予固知茲山者知而白之雖
或不足爲輕重庸非茲山一遇乎昔者瑯琊僻壤耳醉翁一記遂
爲勝概赤壁戰爭區耳坡仙一賦卒成勝境亦惟其遇而已吾固
非其人也嗣是以往有歐蘇其人者遇必能表白茲山以復顯於

世矣夫寧終晦使彼顯者獨擅於東甌哉諸君皆拜手曰至哉斯
言於山有光請書以告來者於是乎書正德戊寅秋九月庚戌碧

溪居士記

陳志鄭志

蔡

芳

見詩
內編

南雁蕩山記

東甌雁蕩爲天下名山山有二其南在平陽者出名尤蚤第以地僻遊者難焉遊必秋杪冬初是以尤難乎其時去年丁丑邑大夫前給諫馬君約往今年重九乃決於夜半放舟抵城南黎明出南津亭西塘河十里外山翠如潑過荆溪舍舟而陸至前倉看鳳山巖石乃餉於寶勝寺潮來發棹抵詹家埠乘月行二三里許至徑川憩智覺寺明日雞初號鐘聲方盡遂出寺不數里過水頭前見數岫遠露如抽亂筍如架筆格如橫修眉爭獻奇狀又前過一溪流甚駛多砥石不可以舟乘馬以渡凡歷三溪始達其境左畔山

際有峙石陡絕表裏天光通透人呼爲石門樓稍前見三巖品列如屏風狀嵌於山腰乃步循山麓右折而行有兩巖相距當其前高數十仞如開兩扉人謂石華表是爲入蕩門戶其巖石之小者如芝房如珊瑚皆有玲瓏孔竅可觀又盤旋澗道里許抵石柱寺山有洞四其西洞尤勝乃步自後草徑歷磴而登夾道簣簣萬箇晴日篩光鐘聲清遠響落翠微又陟磴凡再折抵洞前遂穿草庵中坐傍有木杠橫度可入洞口側又爲欄以扶乃緣之而進其間豁訝虛敞徑數丈而深倍之可羅胡牀數十有仙姑像石罅有泉滴點墜槽中俗謂仙姑浸苧盂旱澇不盈涸直後穴稍仄探之黥暗莫辨物色試作鳴鳴聲如盎缶中語直前有高穴光明爲月牖

乃攀而出之以觀其外復從月牖入洞中將卸衫從左傍孔穴出
不果復從故道出焉洞前遙看僧穿巖上峰頂合掌坐眾相顧以
爲危旣而僧引觀所謂石梁者踐茅茨跡僧武可半里得其所兩
崖峙立長亘數十仞儼若城壁上有石梁跨焉仰視之如飛虬駕
空雄兀可畏倚崖底平望蒼翠遙遙自外入俯臨絕壑有如萬丈
深井神驚膽掉不敢正視遂走入石柱寺馬君已先在矣出行厨
共酌乃出寺度澗而東觀巖下秋水淼沈凝湛旁盼諸峰或卓筆
或虎踞或峨冠或鼇頭或天馬步驟皆可狀獨一峰上插霄漢馬
君號之爲最高峰予欲訪明王峰頂雁湖不可得潛步嶺而南求
之踞棋盤石坐有一叟自林間出顧問之曰此坐者仙人巖也西

畔爲道士巖俱猿狖所居不可以往餘非所知又南行數里無所問途乃回下山晚色蒼然趨輿馬疾行度溪而北改故道緣大麓歷平原返智覺寺明日曉起賦詩而別坐埠頭候潮平發舟西折順流而東回顧昨所遊山漸小漸淡宛在西南天際若不能釋然於懷夫吾邦有此勝跡而不使聞於世是果誰之責哉故遊之又復記之

案右記據古今圖書集成所錄於原文字句頗有節刪陳珙志載此記於南津亭句下有同行者馬僉揮蔡邑博庠士徐祺周岬也十六字與馬碧溪所記文符此不可刪鄭太和將兩記妄爲改竄於同遊人私入鄭東江一名殊爲詭謬

方

鵬字時舉號矯亭崑山縣人進士官
浙江布政司左參議分守温州

遊南雁蕩山記

今夫山高則雄孤絕則奇闐靜則幽美麗則秀四者有一焉猶
以爲勝兼之者其難乎嘉靖甲申三月己卯行縣至平陽令丞以
下各舉其職民亦淳謹自公而退有餘力焉乃於壬午與客行野
晚至前倉汎舟而南篷窗聽雨殊阻人興癸未之晨煙靄四塞勉
而升車鼓吹前引予曰將安用此左右曰以却虎也從之出山入
林景象各殊皆可人意行二十里所謂南雁蕩在焉南之云乎對
樂清者言耳兩崖之間有堂三楹樽俎羅列庶人在官者奔走供
具村氓野老環而觀之以爲僅見已而雲薄霧開日光穿漏客喜

甚乃飲乃食扶掖而登焉紆徐屈曲至仙姑巖矍然一僧云自西湖近適至此或曰自巖入洞可通絕頂惟僧爲能僧遂攝衣攀援而上小飲未竟僧果自洞而出據石而坐如在天表眾仰視之或笑或呼予獨爲懼亟命之下乃循故道使從者以疊榼自隨每遇佳勝輒少止引滿三酌以助足力如天柱卓筆華表諸峰次第歷覽若夫見其勝莫識其名聞其名莫知其處如龍雁所居鐘梵所聚者勢不能遍也蓋嘗評之金城劍閣如其雄也神龍天馬如其奇也枯禪嫠婦不足喻其幽也雪膚玉骨不足喻其秀也凡所謂勝茲實兼之矣且樂清之有雁蕩夫誰不知其在平陽者則未之前聞也以其地僻而道遠非唯軒冕不至雖緇黃不居樵牧不入

惟竹樹叢生狐兔交迹而已使在通都大郡則品題鑒賞歲無虛日豈多讓於樂清者哉古之賢者生丁叔世跡寄窮壤不有物色之訪弓旌之招則終無以自見亦茲山之類歟客有未遇者感歎久之相與登舟夜歸明日大雨

案右碑今在仙姑洞中末題賜進士出身朝列大夫浙江布政使司左參議前南京吏部文選郎中崑山方鵬書大明嘉靖甲申孟夏望日平陽縣知縣松溪葉逢暘縣丞太倉唐祐主簿長洲張俊卿立石碑陰書石川張寰同東溪張浩囂庵張俊卿湖南李如山虛舟王應辰嘉靖己丑年菊月望後三日遊

